

束景南
著



朱熹年譜長編

卷上

(增訂本)

束景南
著



朱熹年譜長編

卷上

(增訂本)

華東師範大學出版社

叙


宋、元以降，朱熹年譜之作多矣。蓋自晦庵卒，即有門人果齋李方子作紫陽年譜，九峰蔡沈作文公年譜事實，覺軒蔡模作文公年譜大略。稍後又有魯齋王柏作朱子繫年錄，其跋評門人三家年譜云：「先生舊有年譜，門人各以意哀集，往往詳其出處者，或略於講學；備其著述者，或缺於事實，殊恨未周。……姑以其可考者類為此篇，先之以師友淵源，次之以致君澤民之事業，而以易簣淵冰之戒終之。」（魯齋集卷十三）三家年譜固各有側重，而其疏略舛漏則一（見余輯李方子紫陽年譜殘篇），又況李方子年譜後來多被人竄亂，是三家門人年譜元、明以後亡佚。其後由元至清，雖年譜紛出沓至，而皆不能出朱熹門人三家年譜之窠臼。今祇觀中國歷代人物年譜考錄即收朱熹年譜五十七種（按：未全備），貌似大觀，率皆不過從李方子紫陽年譜衍生翻出，輾轉抄襲，面目雷同，往往皆就李譜各取所需，節錄增刪，舊譜新編而已。遂使八百年來陳陳相因，乃至踵訛承謬亦譜譜相同而不自覺矣。其可觀者，唯明戴銑朱子實紀、李默紫陽文公先生年譜、清洪嘉植朱子年譜、王懋竑朱子年譜數種而已，然

亦皆簡略疏誤，亦未脫舊譜窠臼也。戴氏主於鋪張褒贈，以誇講學之榮，於譜無所發明。李氏之學源出姚江，陰主朱、陸始異終同之說，於舊譜多所竄亂，彌失其真。洪氏譜過於簡略，考辨未為精確。白田王懋竑朱子年譜號稱最精核，其鉤稽歲月，辨別異同，求行事始末，糾舊譜闕失，固多創獲，度越前人。然是譜之最大痼疾，乃祇在前人舊譜中翻新，但取李本、洪本諸年譜相互參考，訂補舛漏，辨證舊誤而已，實非自作新譜。如此因襲舊譜，在舊譜中花樣翻新，正如朱熹所云「泥裏洗土塊」者，終不能「洗」出一新譜，而考辨反多失察，又有不及舊譜者。若舊譜各本均於紹熙三年壬子下有云「同甫來訪」，白田以為誤，乃移至淳熙九年之下。舊譜各本於乾道四年戊子云「秋七月，崇安大水，奉府檄行視水災」，白田以為誤，乃移至乾道三年下。如此移易翻新多多，皆失誤也。蓋白田主朱學而攻姚江，回護朱熹，遂多偏見失實。如朱熹早年好佛而向宗杲，道謙學禪，晚年耽道而作周易參同契考異、陰符經考異，均諱不言及之。因掩飾朱熹易學與道家道教之關係，乃定朱熹文集中答袁機仲書為偽篇，周易本義中易九圖、筮儀為後人竄入。舊譜載沈繼祖劾朱熹章疏，白田竟以為偽，斥為是「陽明後人依仿偽造，以詆朱子」。不知此疏本昭昭載於道命錄、四朝聞見錄、兩朝綱目備要、慶元黨禁中也。大致白田年譜於學問特詳，而於行事頗略，亦不合年譜體例；主旨辨朱熹為學次第，以詆姚江。而因其資料文獻掌握不廣（如辨家禮為偽，於陳淳北溪先生集竟未一讀），朱熹書


劄又多不得其確切年月，故無論其朱子年譜考異抑朱子論學切要語，皆多錯誤也。朱熹嘗批評漢唐以來經學皆以經傳不分，以傳說經，乃至有傳無經，以傳代經，見傳不見經者矣。余謂朱熹年譜之作陳陳因襲，蓋亦有此通病。故余作朱熹年譜長編，不以舊譜為標準，不以舊譜為依據，而從全面收集原始文獻入手，直接就朱熹文集、語錄等中，考辨朱熹生平行事。唯此，則凡舊譜之誤皆可得正，凡舊譜之闕皆可得明，乃始跳出舊譜窠臼，作成一全新之朱熹年譜也。庚辰夏五月既望，丹陽景南叙。

新安朱氏譜系


婺源始祖世系圖



蘆村府君長房中立公支圖




蘆村府君二房絢公支圖



蘆村府君三房發公支圖



圖支君府溪臨房四君村蘆



【一世】

茶院府君，諱環，又名古僚，字舜臣，行二十一。唐廣明間，因巢亂，避地歙之黃墩。天祐中，以刺史陶雅之命，領兵三千戍婺源，民賴以安，因家焉。官制置，茶院是為始遷婺源之祖。娶杜夫人四娘，合葬萬安鄉千秋里，地名連同。坐丑面未。生子廷雋。

【二世】

廷雋公，字文智，又字文和，行八，環公子。生後梁太祖乾化二年壬申，歿宋太宗淳化五年甲午，壽八十三。葬來蘇鄉安豐里湯村下園。坎山辛向。方氏十三娘，贈恭人，葬萬安鄉松巖里塘村社屋之南。未山壬子向。生子昭元。

【三世】

昭元公，字致堯，小字曾老，行十五，廷雋公子。生後周世宗顯德元年甲寅，歿宋咸平二年己亥，壽四十六。葬湯村廷雋公墓。面坎山，加乾落甲向，水南流復為坤。娶德興馮氏，十三恭人，生後晉出帝開運三年丙午，歿宋太宗雍熙元年甲申三月一日，葬千秋里丁家橋。生二子：惟則、惟甫。再娶夫人金氏，葬官坑嶺下。

【四世】

惟則公，行二，昭元公長子。生子二：綸、雍。

歙溪府君，諱惟甫，字文秀，又字專美，

按年譜作全美。

小字道真，行三。昭元公次子。生宋

太宗太平興國四年己卯十月三十日辰時，歿仁宗至和元年甲午二月九日，壽七十六。葬松巖里之歙溪，今名三公塢。乾亥山丙向。娶程恭人二娘，小名豆蔻。生太平興國己卯三月九日子時，歿嘉祐己亥七月三十日，葬官坑嶺下。庚申山坎向，金斗形梁上穴。生子三：迪、

郢、振。

【五世】

綸公，行二十六，惟則公長子。生四子：邦直、三十九公、四十六公、四十七公。

雍公，行二十七，惟則公次子。生三子：昌言、應言、格言。

迪公，字順卿，行二十一，惟甫公長子。生六子：永言、嘉言、簡言、仲雍、唐英、漢英。

郢公，字公楚，行二十四，惟甫公次子。生三子：悅、恬、恪。

蘆村府君，諱振，按年譜作振之。字文舉，行二十五，惟甫公三子。娶汪氏三娘，贈恭人，葬湯

村。再娶汪氏九娘，與公合葬松巖里蘆村鎮莊。背艮山坤向，巽水歸乾山來龍。生四子：

中立、絢、發、舉。

【六世】

王橋府君，諱絢，字義之，年譜作義夫。振公二子。夫人汪氏，合葬大王橋塢。生四子：虬、

蟾、耆、森。

【七世】

虬公，行十五，絢公長子。

蟾公，行十六，絢公次子。

耆公，行二十一，絢公三子。

森公，字良材，行二十二，絢公四子。少務學，不事進取，每舉先訓戒飭諸子，諄諄以忠孝和友為本，且曰：「吾家業儒，積德五世矣，後必有顯者。當勉勵謹飭，以無墜先世之業。」卒贈承事郎，葬建寧政和縣護國寺西偏。夫人程氏五娘，葬政和縣將溪。生三子：松、樾、樟。

【八世】

松公，字喬年，號韋齋。行百一，森公長子。生有俊才，自為兒童，出語已驚人。未冠，繇郡學貢京師。政和八年同上舍出身，授迪功郎，建州政和縣尉。丁承事憂。服除，更調南劍

州尤溪縣尉，監泉州石井鎮。紹興四年，召試館職，除秘書省正字，循左從政郎。丁母程氏憂。服除，召對，改左宣教郎，除秘書省校書郎，遷著作佐郎，尚書度支員外郎，兼史館校勘。歷司勳吏部員外郎，兼領史職如故，與修哲宗實錄。書成，轉奉議郎，年勞轉承議郎。出知饒州，未上，請祠，主管台州崇道觀。秩滿，再請，命下而卒。吏部之少也，以詩文名，初不事雕飾，而天然秀發，格力閒暇，超然有出塵之趣。其為文汪洋放肆，不見涯涘，遠近傳誦，至聞京師。一日，喟然歎曰：「文則昌矣，如去道遠何！」則又發憤折節，益取六經百氏之書伏而讀之，以求天下國家興亡理亂之變，與夫一時君子所以應時合變先後本末之序，期於有用，若賈長沙、陸宣公之為者。既又得浦城蕭顗子莊、劍浦羅從彥仲素而與之游，則又聞龜山楊氏所傳河洛之學，獨得古聖賢不傳之遺意。於是益自刻勵，痛刮浮華，以趨本實。日誦大學、中庸之書，以用力於致知誠意之地。自謂卞急害道，因取古人佩韋之義名其齋，以自警飭焉。所為文有韋齋集十二卷行於世，外集十卷藏於家。歿紹興十三年癸亥三月辛丑日，卒於建安之水南。紹興之十四年甲子，葬白塔山五夫里，後改葬上梅里。生子熹。

檀公，字大年，行百三，森公次子。為承信郎。生子熏。

按：紫陽保堂本朱氏宗譜發源茶院朱氏系圖作：「檀公，字大年，行一百三，森公次子。中武舉，功官承信郎。葬政和縣延福寺後將溪。娶吳氏，繼丁氏。子一：熏。」

樸公，字逢年，行百四，森公三子。負軼才，不肯俯仰於世。有詩數十篇，高遠近道，號玉瀾集。為建州貢元。

【九世】

熹公，字元晦，號晦庵。行五十二，松公子。生高宗建炎四年庚戌九月十五日甲寅，生於南劍州尤溪縣之寓舍。登紹興戊辰第，賜同進士出身。歷仕累官至朝奉大夫、華文閣待制，卒寧宗慶元六年庚申三月乙丑，壽七十一。葬建陽唐石里大林谷。理宗寶慶丁亥贈太師、信國公。紹定改封徽國公。娶白水劉致中女，生三子：塾、堃、在。

熏公，字仲修，行五十五，樸公子。生四子：堦、璧、堅、珪。

【十世】

塾公，字受之，行大，熹公長子。從東萊呂先生學。生紹興癸酉七月，歿紹熙辛亥正月二十四日。夫人潘氏。生子鑑，官知巢縣，知漳州，無為軍，監進奏院，知興國軍、淮西運使、